



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 8

Chichiba linük anemertemji  
telemsa adokdaksürtem lir

Rafael Nadal ATP Barcelona  
asayamung nung masayatsü



VOL. XX NO. 182 (ADOK 182)

DIMAPUR

KÜPTOKNÜ (SATURDAY)

RONGCHII (APRIL) 15, 2023

₹ 5.00

## NSF-i CSRE 2022 mokdangter; lungkak aittsü

**Kohima, April 14, 2023 (TYO):** Combined Staff Recruitment Examination 2022 nung viva-voce marks 12.5% aliba nungi 5% kümjang ta state sorkar dang akhangba melangzüba asoshi NSF-i CSRE tatidang mokdangtsü aser lungkak aittsü lemtetogo.

"November 16, 2022 nü NSF-i Chief Secretary, Nagaland dang CSRE 2022 nung 12.5% nungi 5% akümtsü atema shidi ka zülua liasü" ta President Kegwayhun Tep aser Secretary Education Medovi Rhi nati sangdong ka nung ashi.

CSRE 2022 ya Nagaland Staff Selection Board (NSSB)-i ketdangtsüa agir aser March 8m 2023 nunga iba onük nenshiogo, ta NSF-i ashi.

NSSB Regulation 2022 nung ajemdaker Board-i 12.5% lezmüksüba tai kechiyong section 45(10) nung minimum limit masü saka maximum limit indang dang shia lir, ta NSF-i metetdaksü.

Kaketshirtem aser lanurtemi

akhangba onük atema kecha meinyktsüi NSSB-i April 12 nü CSRE 2022 nung takok angur candidates indang Personal Interview osang metetdaksü. Iba ajanga NSF-i 4 buba Presidential Council Meeting nung lemtetba ama lungkak aittsü aser CSRE 2022 indang Personal Interview mokdangtsü, ta parnokisa ashi.

April 17 & 18 anogotem CSRE 2022 indang Personal Interview mokdangtsü aser iba takhangba atema telangzüba mangu tashi ozüingi melaba ama lungkak aittsü, ta NSF-isa metetdaksüogo.

Maneni, CSRE 2022 atema viva-voce jaokba candidate ajaki shilem magitsü mepishir, ta NSF-isa ashi.

"Public, NSF indang Federating Units aser Sub-ordinate bodies ajaki NSF nungita yaritsü mepishir. Iba takhangba ya NSSB züngsemtem anema masü saka free & fair recruitment process taginüba atema ola adoker" ta NSF-isa metetdaksü.

## YouthNet-i Launchpad Education & Career Fair ayongzük

**Kohima, April 14 (TYO):** Nagaland Department of Youth Resources and Sports aser YouthNet na longjemer tawa HSSLC tatidang agütsüba kaketshirtem atema Capital Convention Centre, Kohima nung "LaunchPad Education and Career Fair 2023" tenzükogo.

"School ajak nung tesayuba aser tangazükba yimya koda tongtibang iba indang lemsatepba den state nung education system ajungkettsü atema innovative program tem benoka jenjang tulu ka agiba atema sendaktepa alir ajak nem tenüngsang agütsür" ta iba sentong nung Industries & Commerce Advisor Hekani Jakhalu-i ashi.

Hekani-i School tajungtiba LaunchPad Awards GHSS Tseminyu nem agütsü aser MLA Dr. Tsielhouuo Rhutos-i LaunchPad Best Teacher naroküm GHSS Jotsoma nungi Rhonbeni Kikon aser GHSS Chukitong, Wokha nungi Chichan nem Smart Phone kaka agütsü.

Department-i lanurtem ajungkettsü atema inyaka aruogo aser ibayongji YouthNet den longjemer aser Department of School Education teyari agia 2020 küm April ita State Fund kübok LaunchPad tenzükba liasü ta YRS Director Akumla Chuba-i ashi.

Iba ya Nagaland kübok Government Higher Secondary Schools 44 prongla nung class 12 nung azüngertem atema Career Guidance and Employability Skills Development

Program ka lir, ta lai ashi.

Iba sentong ya kaketshirtem parnok sempet arangtetsü aser kaket shisatsü tali bushilokyonga aotsü atema ajungmesotsü, mapa tasen bushia aotsü atema ajungshitsü aser parnok sempet aser tejangraba dak ajemdaker career yanglutsü atema apiteta yangluba lir, ta Akumla Chuba-isa ashi.

Iba sentong yagi nukjidong ayuba ama kaketshir 3000 ayimjemogo. 2020-21 nung kaketshir 3394 züngoksem aser 2021-22 nung kaketshir 3397 züngoksema liasü.

Kasa mapang nung YouthNet Director, Nuneseno Chase-i, LaunchPad indang tongmelang agi metetdaksü aser Deputy Commissioner Kohima Shanavas C aser Principal Director of School Education Thavaseelan K natia o tatsütsü jembia liasü.

Iba sentong ya Emmanuel Baptist Church pastor Zakie Metha-i sarasademer tenzük aser lokti pela agizükba aser anküp o Ravolü Chüzho-i jembia liasü.

Hokolbarnü ayongzükba agiba fair ya Kohima nung tatabangbuba LaunchPad series asütsü aser Honibarnü Tetso College, Sovima nung agütsü.

Iba LaunchPad nung college, VTIs, ITIs, polytechnics 35 aser company balala nungi potential employers temi shilem agütsü.

Osang ajanga ashiba agi, LaunchPad program kübok kaketshir teshimtet kar nem graduate süa azüngtsü atema scholarships agütsütsü.

## Nagaland nung 'Tobacco Free Schools to Tobacco Free Homes' tenzükter MAY 1 NUNGI SCHOOL AJAK 'TOBACCO FREE' AKÜMITSÜ



**Kohima, April 14, 2023 (TYO):** National Tobacco Control Programme (NTCP) indang Nagaland chapter ajanga Hokolbarnü Tobacco Free Schools to Tobacco Free Homes ta ser anti-tobacco campaign ka tenzükogo.

Iba atema Health and Family Welfare (HFW) Commissioner & Secretary Y. Kiheto Sema-i Little Flower Higher Secondary School (LFHSS) Kohima kaketshir 25 nem 'Tobacco Free Home Certificate' agütsü.

Sentong nung Director (Dental) HFW, Dr Theyiephrezo Khimiao-i LFHSS administration nem tenüngsang agütsüba certificate ka agütsü.

Iba ya linük nung tang mezüing inyaker. Kaketshirtem aser talisa tetsürtemi pei tsüraburtem aser adianutem dang moko machitsü tesayuba agütsütsü atema tobacco free home campaign tenzükter, ta Kiheto Sema-i ashi.

"Tobacco free schools nungi kaketshir shiai iba campaign nung shilem agira ki meyirjang aika melenshitsü. Ki shia nung iba osang metetra iba ajanga sensotem yimya melenshitsü aser

tashidak, tasüba aser loktiliba nung rongsenketzüng khuret ajema akümtsü" ta pai metetdaksü.

"Nagaland nung sorkar aser nija school 2,684 nungi 356-i tobacco free institutions ta sangoktsüogo. Ajisüaka arishi küm 13 nungi 15 tsüingda 43% tashi moko achiba atema sasar" ta Kiheto-isa ashi.

"Kaketshirtem dang moko achiba ajanga timtem agütsüba osang sangoktsütsü atema Health department-i May 1, 2023 nungi Nagaland nung sorkar aser nija rejutem ajak Tobacco Free Zone (TFZ) ta sangoktsür" ta paisa ashi.

Shisaliok teju telongtet metre 100 nung moko ayokba aser achiba noktangtsü, ta paisa shisem.

State sorkari taoba nung government hospitals, health care centres, health Directorate, Private Hospitals, Health Institutions ajak Tobacco Free Zone ta sangoktsüogo. Maneni, taruba sangdong nung government, public offices, institutions asütsü, ta Commissioner & Secretary-isa metetdaksü.

Nagaland nung tain 43.3%

tashi moko achir ta Global Adult Tobacco Survey (GATS-2) ajanga bushitetogo. Global Youth Tobacco Survey (GYTS-4) ajangasa arishi küm 13 nungi 15 tsüingda school-ia aoba tanur 43% tashi moko achir ta bushitetogo.

"Tanurtem pei kidang tsürabur dang nungi moko achiba angazükter. Anungji tanurtem dang pei kidangi oa pei tsüraburtem dang moko achiba ajanga timtem agütsüba osang shidaksütsü atema iba campaign tenzükter" ta Additional Director Dr Chiekroshuyi Tetseo-i ashi.

Kaketshirtem nem pei kidang anti-tobacco awareness ketdangtsüa agidaksüra ki meyirjang aika dangi iba campaign bener aotsü lenmang lir, ta paisa ashi.

Iba sentong nung Joint Director Dr Meribeni Odyuo menden liasü, Sister Superior Rosemary Adaphro-i tesentepertem pelaa agizük aser State Nodal Officer, NTCP, Dr Arenla Walling ajanga anküp tepela o jembi.

"Student ambassadors nem Tobacco control law (COTPA 2003) indang osang tatsü agi metetdaksütsü" ta Dr Arenla Walling-ia ashi.

## Dimapur nung Road Over Bridge (ROB) atema nenshir

**Dimapur, April 14, 2023 (TYO):** NH-29 nung Hotel Tragopan anasa Road Over Bridge (ROB) yanglushitsü aliba dak sendakba nung tanü nungi tenzükba anogo ananü atema traffic tendanger.

ROB mapa tenzükba inyakdang

traffic asadangtsü atema iba mapa inyaker. April 14 nungi tenzükter April 15 tashi iba apu anatsülen shibanga ayutsü, ta ACP Traffic Dimapur Ngimchule-i ashi.

Lenmang shibanga ajanga tanü mezüing anogo nung traffic kanga aika liasü saka koktetogo.

April 15 Honibar asüba agi tanü dang nungi traffic temelesa asütsü ta ACP Traffic Dimapur-isa ashi.

Public-i district administration aser Dimapur police den amalitepa yaritepba aser inyakyim sülen anidakba atema kanga pelar ta laisa ashi.

## Angami nunger lushi nung NMA maparen noktanger: AYO

**Dimapur, April 14, 2023 (TYO):** Angami Youth Organisation (AYO)-i Angami lushi nung Naga Mothers' Association (NMA) maparen ajak noktanga metetdaksüogo.

NMA tanishirtemi Nagaland taginüba anema mapa inyaksangshir, ta AYO-i sangdong ka nung ashi.

Nagaland putiotsü nung tetsürtemi shilem tulu agiogo aser tesüiba nung telok aikati nübortem asoshi inyakogo. Ajisüaka, mapang ka Nagaland nung tetsürtem asoshi noktanga NMA-i alizüing aser teinyaksütem nungi pilaogo ta AYO-isa ashi.

Tanü Naga Mothers' Association (NMA) ya loktiliba asoshi tajung inyaker masü saka tetsükdaksü aser lendong bener arutsürtemi kümogo. Kin balala nungi tetsür teloktemi NMA nungi pilaogo. Kin hohotemi mepishiba aser tetuyuba agütsübatem anema inyaksangshiba angudang AYO-i ola madoki meliteter aser tanü NMA ya pei sasa shimtetba tetsür kari pei inyaknüba ama dang inyaker, ta parnokisa metetdaksü.

State sorkar, teloktem aser forum balalai NMA tanishirtem magizüktsüla aser ozüingi melaba ama NMA ketdangpurtem

meshim tashi Angami nunger lushi nung NMA maparen kecha meinyakdaksütsü, ta AYO-isa ashi.

Brihostibarnü Rengma Hoho-ia Rengma Mothers' Association dang NMA nung madentsü tetuyuba ka agütsüogo.

Naga nunger ajunga taginüba nung ajemdaker RMA-i NMA den tesentaktep pilatsüla ta Rengma Hoho-i ashi.

Lokti nung telemsa adokdaksüba teloktem aser pei nübortem asoshi lendong bentsür arurtem den Rengma nunger telok shinga medendaksütsü ta Rengma Hoho-i sangdong ka nung ashi.

# Mkg. nung G.A Rest House Nagaland CAWD & Taxes Advisor Kudecho Khamo-i mesemtetsü



Mokokchung nung G.A Rest House Nagaland CAWD & Taxes Advisor Kudecho Khamo-i (tachichi nungi pungobuba) mesemtetsür kelen Advisor Temjenmenba ,Advisor Imkongmar aser Mkg. DC Shahank Pratap Singh,IAS den sentong nung shilem agirtem tangokba noksa.

**Mokokchung, Rongchii/ April 14 (TYO) :** Tanü Mokokchung nung General Administration (GA) Rest House Nagaland CAWD & Taxes Advisor Kudecho Khamo-i mesemtetsüogo.

Nagaland nung G.A Rest House süa alibatem aika nguogo item dang nung jagi iba ki ya tajungtiba rongnung ka lir, Iba ki ya ajanga sorkar tenzükeritem aser Mokokchung nübur dang masü saka Mokokchung anasa aliba district-temi teyari tuluba agitettsüta Nagaland CAWD & Taxes Advisor Kudecho Khamo-i iba ki mesemtetsüba sentong nung jembidang ashi.

Nagaland CAWD & Taxes Advisor-isa Naga nung rongnung Aor dak sempet tajung aika lir item sempet tajung rongnung Aori bendanger kanga dang junga anepalur, anungji iba ki nung arua anisüngzükeritem anepalu tajung ngur jangratema munger aotsüta shisem.

Nagaland Chief Minister Neiphiu Rio lenisüba nung Naga

lima nung yimjung den ano terenlok jenti bener arutsüogo,Rio lenisüba kübok Naga lima nung terenlok mapa jenti dang inyaksü asoshi sentong aika lir, talisa district tasentem nung terenlok mapa jenti sentong lir ta Nagaland CAWD & Taxes Advisor-isa adenshia aliba nüburtem dang metetdakja ashi.

Sentong nungsa Mokokchung Deputy Commissioner Shahank Pratap Singh,IAS-i District Administration tenung nung jembidang Mokokchungji Zünhebotu,Tuensang,Mon,Noklak aser Shamator asoshi kanga dang tongtipang district ka lir,anungji iba ama anisüngzükbaka ki ka mapang talangka nungi kanga dang nungtaka ali asangsang nung atalokdang ya Mokokchung kisüng asoshi dang masü saka kidang district-tem aser Naga nung er ajak asoshi kanga dang temoatsüta lir ta pela-a bilemerta ashi.

Iba ki tanu sütetaka ano

tajungtiba nung nübur achayanga yangi aruagi tiptema anisüngzüktetsü asoshi nungtakba osettsüsettem aika peria mali,anungji item osettsüsettemji anepalua ayutsü asoshi kanga dang nungtakerta Mokokchung Deputy Commissioner-isa nungtakbatem metetdakja liasü.

Kasa sentong nung Nagaland Transport & Technical Education Advisor Temjenmenba aser Nagaland Minorities Affairs & Sericulture Advisor Imkongmar tenatia shilem agia jembiba den Ki asüba osang Er.Süngtiba Amer Executive Engineer (CAWD) ajanga agutsü.Ki meshitet aser sentong nung Tsüngrem lenisüba jazüka MTBA Pastor Rev.P.Chuba Jamir-i sarasadem aser iba sentong EAC Mkg.Abeinuo Jasmine Ashao ketdangsüba nung agia liasü. Sentong nungsa Sangtemla Ward Yimden,Ali kibur,NDPP Mokokchung Region nungertema dena liasü.

# AKM-i Survival Mokokchung mapatong inyaksü asoshi sangdonger

**Mkg, Rongchii/April 14 (TYO) :** Ao Kaketshir Mungdang-i(AKM) "Survival Mokokchung" dak ajemdaker Mokokchung jila telungtet nung tsümalongmar (non-local) nütsüng yongsük asadangba aser ozüng agi memelaba nigungtem aser kuli tejangja makar mita repringba maparen 2023 April 17 nungi

tenzüka April 21 tashi anepdang 9:00 Ako nungi nikongdang 4:00 Ako tashi inyaksüta AKM Tatong Tir Sb.Onenpong ajanga sangdong ka nung metetdaksüogo.

Anungji tsümalongmar, ozüng agi memelaba nisungtem aser kuli tejangja makartem ajak aguja aliba anogotem aser mapang shitak

nung ILP,AKM Census Card, Kuliser (Gurantor)nungi NOC aser pei aliba ward,sector nungi Temporary Resident Certificate" nung house number, ki kibur tenung aser iba den ward aser sector nungi seal aser meyongnem kuli shitak bener arungta AKM-i kasa sangdong nungsa metetdaksü.

# Mon DC-i metetdaksür

**Dimapur, Rongchii/April 14 (TYO):** Deputy Commissioner Mon, Ajit Kumar Verma-isa sangdong ka ajanga, Mon District kübok office aser Institution tekolaktem aika tapet ketdangsürtem dang nungi temelaba magi-i parnok station tem toktsür aoer, koba ajanga sorkar office/department inyaksangshi nung tetsükdaksü adokba dang masü saka nüburtem nema timtem agütsür, ta ashi.

junga inyaksangshi masüba indang tashishiba angazükogo. Anungji temalen shisema aliba onük aser nüburtem tejangraba apir ketdangsür ajak dang parnok station toktsür mao tsüngda leave meshitsü aser iba dak sendakba nung jelia tezüluba nung temelaba meshitsü nungdaker, ta DC-isa ashi.

Tetuyuba sülen manidakra temzüng ozüng tapet dak ajemdaker aibelenertem anema jenjang tapet agitsü, ta kasa sangdong ajangsa metetdaksü.

Iba dak sendakba nung ketdangsür aser staff tem maliba ajanga sorkar office kar

# Mokokchung DISHA senden athir

**Dimapur, Rongchii/April 14 (TYO):** Deputy Commissioner Mokokchung, Shashank Pratap Singh-isa sangdong ka ajanga, MP Lok Sabha aser District Level Coordination & Monitoring Committee (DISHA) mendenbuba Tokheho Yepthomi-i April 17 nü senden amentsü atema ayongzüker aliba osang tejangja ka magütsü tashi thinena atar, ta metetdaksüogo.

**NBSE-i institution tekolak tasentem senden ayonger Dimapur, Rongchii/April 14 (TYO):** NBSE-i sangdong ka ajanga 2022-2023 tsüngda shimba Institution tekolak tasentemsen den April 28 nü 10:00 ako nungi tenzüka Kohima nung senden ka amentsü ta metetdaksüogo. Senden nung institution tekolaktem tinyaksü maparen aser khuretem aser Board indang temzüng ozüngtem indang sensak asemtsü. 2022-2023 tsüngda shimba institution tekolaktem ajaki iba

# High Court Complex,Meriema nung süngdong atem



**Kohima, April 14 (TYO) :** Gauhati High Court platinum jubilee amungba tenüng nung tanü High court complex, Meriema nung süngdong atemba sentong ka Bar Association purtemi ayongzüka agiogo.

Iba sentong nung Justice & Law Advisor, Wb.T.N.Mannen dena shilem agia liasü. Pai iba sentong nung jembidang, Bar Association nung züngsemtemi alima meima iba ama sentong tajung ayongzüka akaba asoshi pelaba metetdaksü.

Nagaland nung Naga nung akaba rongsen tulutibaji ali ya lir, anungji ali ya kümzüka ayutsü aser asenok ajangzüksüsa amshitsüba kanga tongtibang

asütsü ta paisa ashi. Nagaland nung ali dak aketba temzüng ozüng ya Nagaland Municipal Act nung tongtibang shilem ka akümsü alinung, iba ozüng yangludang town nung alirtem dang masü saka yimtaklirtema ajangzüksüsa latetsü merangtsü ta T.N.Mannenisa shisem.

Nagaland-a High Court Complex tasenba ya yakta renemtsü nungdak asünungji, pai Chief minister den jembia yaktasa renema mapa tenzüksü merangtsü ta paisa metetdaksü.

Tanü iba sentong nung süngjang aser narodong dena süngdong tapu ajak agi 14 bendena süngdong ajak agi 1000 temtsüogo.

# DIG (Border)-i arrtsü nung aliba tesemtem semdang

**Dimapur, Rongchii/April 14 (TYO):** DIG (Border) Nagaland, Rajashekhar, IPS-i, April 13 nü Wokha district kübok arrtsü nung aliba Ralan, Merapani, aser Changpang tesem semdanga lenirtem den sensaksemogo.

DIG (Border) Nagaland meina Deputy Commissioner, Wokha Ajit Kumar Ranjan (IAS), aser Superintendent of

Police Wokha, Aotula Imchen, IPS, Border Magistrate, Dy. Commandant 7th NAP Bhandari, CRPF aser tanga ketdangsürtem oa liasü.

DIG-isa, Sorousotsu Ralan nung amenoka aliba 7th NAP Company Post, Changpang nung amenoka aliba NAP Company Post aser Bhandari Police Station semdanga liasü.

# NSCN/GPRN-i ketdangsür ana mapa nungi anentsü

**Dimapur, Rongchii/April 14 (TYO):** Sorkari tashi agüja aliba dak ajemdaker Central Secretariat, NSCN/GPRN-i, Under Secretaries Chenithung Ezung, adser Jimmy Lotha na mapa nungi anentsüogo. Tenati linük aser lokti anema inyaksangshiba maparen nung shilem agiba atema mapa nungi anentsüogo.

April 14, 2023 nü Secretary, GPRN office sangdong ka

ajanga ashiba agi, sorkar Ahza dak ajemdaker ketdangsür ana inyaksangshi ajanga tena tanga tang mapa nungi anetsütsüsa kümogo.

Jija, lokti tentet balal, union mesüra shishilembartem shirnokisa parnok den inyaksangshidir parnoki parnok mulungka nung inyaksangshitsüla aser sorkari khuret kecha mabentsü, ta kasa sangdong ajanga metetdaksü.

# Chichiba linük anemertemji telemasa adokdaksürtem lir: Sonia Gandhi



New Delhi, April 14, 2023: Hokolbarnü Parliament House Complex nung linük tatong tir, Jagdeep Dhankhar, Ato kilonser Narendra Modi, Congress Tir, Mallikarjun Kharge aser taoba mapang Congress Tir, Sonia Gandhi nungeri BR Ambedkar asoba anogomong nung asür nem akhüm agütsüba sülen tangokba noksa nung angur.

New Delhi, April 14 (Agencies): Brihostibarnü B R Ambedkar asoba anogomong nung sorkar aija taoba mapang Congress tongti, Sonia Gandhi-i, tang aliba sorkari linük temzüng kübok amenokba reju balala tim mesüi amshir, ta metetdaksü. Ambedkar sor küm 132 ajungba anogomong nung osangkaket ka nung ocet ka ajanga Sonia Gandhi-i, tanü chichiba linük anemertemji tamangba yimsü, oshi aser kin nung ajemdaker India nunger tsüingda anemtepdaksütsü atema tim masüba nung tashi amshirtem lir, ta ashi. Sonia Gandhi-i, nübürtem temeden kümzüksü melen

ozüing tim mesüi amshia nübürtem amokmerener; India nunger teimbaka senotsü agi timtemba mapang nung nisung kar dang tajangzüik angur, ta ashi. "Asen linük puti otsü nung tang ama kanga tongtibang mapang ka nung nübürtemi linük temzüng kübok rejutem kümzüksüla," ta lai ashi. "Tang ama tongtibang mapang ka nung yimtenren party balala nungi süaka, unions aser associations balala nungi süaka telok aser nija ajaki pei shilem inyaksüla. Dr. Ambedkar taküm otsü aser pai ajangshiba timtem balala ajanga tongtibang lesson aika sayur, aser itemji ajanga asenok len anidaksütsüla," ta lai ashi.

# Delhi excise policy ken o nung CBI-i Delhi CM Kejriwal jaoker



New Delhi, Rongchii/April 14 (Agencies): Delhi excise policy ken o dak sendakba nung asüingdangyatsü atema Central Bureau of Investigation (CBI)-i AAP tongti aser Delhi Chief Minister, Arvind Kejriwal April 16 nü jaokogo. Iba dak sendakba nung AAP-i, election commission-i AAP nem national party jenjang agütsüba ajanga Centre sorkari party anema inyaker, ta aitsü. Osangbenertem senden ka nung jembidang AAP lenir aser Rajya Sabha MP, Sanjay Singh-i, Chief Minister Arvind Kejriwal aputsü atema asalentong ka yanglua lir, ta metetdaksü. Ato kilonser, Narendra Modi aija Sanjay Singh-i, "Delhi Assembly nung Arvind Kejriwal-i, Ato kilonser medemer indang ochimashi senji Ato kilonser indang ochimashi sen, ta jembiba anogo

nung ni pa (Kejriwal) dang, tang na anema inyaksü, ta shir liasü. Ato kilonser ochimashi nembangtsütsü atema parnoki ajak inyaksü," ta ashi. Taküm February ita nung CBI-i Delhi Deputy Chief Minister aser AAP lenir, Manish Sisodia pua liasü. Delhi excise policy ken o dak sendakba nung pa dang ghonda ti dak tema asüingdangyaba sülen pa pua liasü. Yaküm July ita nung Delhi Lieutenant Governor, VK Saxena-i, excise policy nung ochimashi liasü, ta shia iba ken o bushisüingdangtsü atema CBI nem agütsütsüla, ta benok. Iba sülen August ita nung CBI-i Delhi-NCR aser Punjab nung tesem 20 mita ao. Excise policy ken o nungsa Enforcement Directorate-ia Arvind Kejriwal indang personal assistant, Bibhav Kumar dang asüingdangyago.

# Kum Ka Suigo Saka Mamateter

Temeim ojalai onok toktsur or tanu kum ka ajungba anogo Tsungrem tenung sanga amonger.

Temeim oja, na tanu onok den meliaka, ne menurem jakden onok nukla nung teti lir. Anogodokshia ne takum aser temeim mapatem bilemtetang, onok mulungjang sangwar aser ne mapa tajungtem asoshi Tsungrem tenung asanger. Amanger, nai kotak nungi onok asoshi teti sarasademtsur. Kenu anogo Tebu langpang tsungdang asenok tanaben ajuruteptsu, ya onok tamang sarasadem.

Temeim Kinungpo, Chirnurtem aser Anukapang



Late Mrs. Tainla Imkong

**GOVERNMENT OF NAGALAND**  
**DIRECTORATE OF HIGHER EDUCATION**  
 NAGALAND: KOHIMA

NO.HED/HOST/1/2016 Dated: Kohima, the 13th April 2023

**NOTIFICATION ON NEW HOSTEL REGISTRATION FOR POST MATRIC STUDENTS**

It is hereby informed to all those seeking for New Hostel registrations under the Directorate of Higher Education that the Directorate (Scholarship Section) shall issue forms for New Hostel Registration with effect from **17th April to 5th May 2023** and the last date for submission of the forms will be **31st May 2023**. Therefore, any individual who wishes to run hostel for Post Matric Students may come and collect the forms within the stipulated time.

The registered hostels that are due for renewal are also directed to renew in time, failing which the hostel shall be considered null & void.

It is also to be reminded and cautioned that the Department issue this Hostel Eligibility Certificate only to facilitate hostel forms for Post Matric Students residing in the Hostels under the provision of Scholarship guidelines. Hence, any misuse of Hostel Certificate shall be liable to his/her own risk.

**Addl. Director & HOD  
Higher Education  
Nagaland : Kohima.**

# Anojungi kiyimba anema Centre-i inyakyim ka latettsüla: SC

New Delhi, April 14 (Agencies): Assam sorkari tanur asüandang kiyimertem anema mapatong tenzüka nisung aika apuba sülen ita ka ser tesadang shi süia aodang Supreme Court-i Centre sorkar dang Prohibition of Child Marriage Act, 2006 mapa kuma inyaksü metetdaksüogo. Küm 100 tejaklen tanur asüandang kiyimba ya ozüing ajanga nokdanga liasü aser tanur asüandang kiyimba anema 2006 küm Prohibition of Child Marriage Act benok, ajisüaka tang tashi arrshi küm 18 majungdang kiyimba anema temepishiba ken o ka angadanga mapang nung Chief Justice DY Chandrachud den Justice ana- PS Narasimha aser JB Pardiwala nungeri akümba bench-i Centre sorkar dang, state balala nung tanur

asüandang kiyimba osang bendenang, ta metetdaksü. SC-i additional solicitor general, Madhavi Divan dang state balala nung tanur asüandang kiyimba osang bendenba sülen report agüjang, ta tuyu. SC-isa Centre sorkar dang, Prohibition of Child Marriage Act mapa kuma inyaksü asoshi kechi inyakyimsa benshidar, ta asüingdang. SC bench-i, "Ministry of women & child development-i item onük nung telangzüba tejangja affidavit nung agütsütsü onoki imlar. Iba dak alia ministry-i 2016 küm ozüing kübok Arrla 16 nung aliba ama state balala nung child marriage prohibition officers shimba osang agütsütsüla. State temi child marriage prohibition officers shima ali asü tanga

officer kar nem additional charge agüja aliar centre sorkar nem metetdaksütsüla," ta metetdaksü. 2017 küm melungtet telok- 'Society for Enlightenment and Voluntary Action' -i Unicef indang report 'Reducing Child Marriage in India' nung ajemdaker Supreme Court dang tetsürtem arrshi küm 18 majungdang kiyimba nokdangtsü atema temepishiba ken o benoka liasü. UNICEF indang report nungji yamai shia lir, "India nung arrshi küm 20-24 tsüingdapur tetsür shilem 47 bo küm 18 majungdang kiyimertem lir." 2011 census nung shia aliba agi, tetsür lakh 78.5 bo arrshi küm 10 majungdang kiyim aser kibong kümer alir tetsür shilem 30.2 bo arrshi küm 18 majungdang kiyimertem lir.



Balrampur Hospital, Lucknow nung COVID-19 atema terenemshiba asadangtsü atema mock drill ka ayongzüka agiba mapang Uttar Pradesh Deputy Chief Minister aser Health Minister Brajesh Pathak tangokba noksa nung angur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 15, 2023

### Asenok akhüm maket

**A**no khen, yakanü Dimapur nung India government tenüng nung Naga nungertem den jembitsü yokba nisungi NSCN-IM aser NNPGs telok na prongla nungi teshimtet purtem ajuruogo. Parnok senden nungji Naga yimten ken o tebilemsü ya tatem küma telatetba kati arutsü atema tebilemba tasen karbo benoka jembia asü mesüra kasa tejen ken o dang jembir senshiar ashitsü makok, saka senden aliba tajangzükbo kecha balaka mangashir. Aji oda, mapang atongba agi asenok lokti küm tatem senden jatepba mesüka, ashiko, India government den Naga yimten ken o jembiba mapa yaa Naga yimten latettsü atema masü saka mapang atongba agi süngo marok kaka danga jemer senshitsu atema jatepba amai asütsüa akok. Iba amaji yimten ken o jembiba nükjidong aser taginüba kecha melii ajurutep ajurubaji mapang endokba mapa ka dang kümogo. Idakji India ajangzük aser Naga nunger akoksar. Mezüng Naga nunger taginüba aser tejangraba dang masü saka temetenji tangar bendanger yimten shinga kübok melii Naga yimten bentetbenteta balaka kümteta alitsübjaji liasü. Ajisüaka, tangbo iba temeten, taginüba aser tejangraba nungi talangka asepzüka aluogo. Joko, tangbo asenok balaka masü külem yimten (shared sovereignty) jenjang ka nung alitsü indang jembir aser iba jenjangjia mengutet küm metsü dak tali süir. Asenoki India government den Naga yimten jenjangji ajaki akhümketa agizükettsüsa ka nung latetner. Ibaji state government aser Naga nunger lokti tentet ajak taginüba aser teyongyaba ola kümogo. Aji kanga junger, kechiyong shibaibo küm paikaya nisung taküm paikaya lalua rarar akhüm maket Naga yimten jenjang ka nung latetnüsü ? Ajisüaka, asenoki asenoksasa jungjunga bilemdangtsüba kaji, asenoki aginüba ama Naga yimten jenjang tasen ka akhümketketa latetettsüsa asenok daka akhüm lir asü, mali ? Aji oda, asenok dakbo kecha akhüm maket ser asenok asoshi tangar den ken o akhümketketa latetettsüsa jemtettsüa ta asenoki bilemer asü ? Asenok jenjang ya kodang asenoki bilemdangdir, asenok dak malangba ka asenoki meshir aser imlar amai ka kümdokogo. Tanü asenok yimten nung alima matsüngdang akhüm maket akümba ya kong miimshitettsü ? Naga yimten jenjang tajungba ka latetnertem rongnung president aser prime minister zünger mezüngma ! Anogo ka süli telok tasen ka kümli, anogo ka süli Naga nunger meputepba kümli ta asenok akhüm kong ali ? Aji oda, Naga yimten ken o jembia - jembia asenok Naga yimten nüchiso bushir asü, rongsen bushirang mejangjatet ka akümba ya koda ? Ibaji India government-i angur aser yangji asenok akhüm maketba-maketba akümer. Ashi, India government-i asenok akhümketa reprang asübo, yamai kuli küpdok yimjung ken o tanen maka jembia moula. Aji oda, tanü asüng anogo shia shishilembadakbo metsü mersü nungi shir merang oset tashi nung jenjang tupet atur, saka asenok Naga nunger yimten jenjang aser akhümbo alupet alur. Asenok joko, akhidang Phizo aser Imkongmeren nunger aliba mapang amato masü, timtema maremer anungji akhüm samar. Asenok dak akhüm alidangbo India ato kilonseri asenok aja aser tang asenoki meshiba dang nungi yimten jenjang tuluba agütsütsüa mulunga liasü. Ajisüaka, tangbo asenok shiba den kechi jenjang ka atema jembir ? Idakji akhüm lir na ? Tangari yimten nung asenok akhümstübuttsüsa asenok lidar ma ? Akhüm ya angati anguba oset ka masü saka yabo meranga inyakba agi, tashitemetter asüba agi, ochishia aliba agi, shitak nungbo timtem arema marakzüi nokdakba agi aser longjema aliba agi angur. Asenok dak iba akhümji lira, hau asenoki akhümket Naga yimten jenjang ka ngutettsü, kechiyong akhümji akhümketer dangi dang arutsü. Yamaji ka mesüra, asenoki India den kechi jenjang ka nung lia kechi atema jembiar aji khen jungjunga bilemdangtsüla aser asen temeten yari masü asen akhüm yari dang yimten ken o latetettsü ta angatet nung junger.

## OLEMSABANG

### Yisu Khristai Kangki nungi jembiba Oren Tenet (7)

L. Ngangshi Jamir, Mokochung Village

Asenok ajak alangzüksang Kibuba Yisu Khrista meimchir ajak atema taküm agütsütsü atemzük aser alimai aru asu nung Pai shinga anema mejembi, tamajung kecha meinyak, ajak ajungtsü atema dang aser ochi aser temeim mapa atema dang jembia inyakaka Farisi, Saduki aser Putiungertemi tenük merem aser tashiim agi pa Yimden anemer aser Yimten raksar kümdakja pua arur merenshia züka, atala-a sensaja aonung tepiyong o bendang dak anir senzür külen tiyazü kuli taputapu agi aija kangki nung metatsü o bendang agütsü.

Machi majem tepok tazüng den temang ajak mena azü ajak yimdoka zükrepa zük aser menokdakteti alidang kangki taret apudaktsür Kalvary lenmang tepiyong anir aodang kangki mekoki laoya alidang metsüoktsüli, ajemoktsüli ta mekangshitsüim ajak agi kangshia alima nung tulutiba aser tematiba temerenshi agüja tesashitiba tekangshi aser taochi makatiba tekangshi agi kangshia Kalvary tenem tonger külen tatala aser tesensa manung parnoki Pa kangki nung angenlok.

Kibuba Yisu Kangki nung agenloker ghonda ishika taküm alidang Pai Kangki nungi jembiba o tenet (7) ya arok aroka ken shisadanga züngdang aser temoatsü agiang ta tazünger ajak ayongzük.

#### Yisui jembiba o tem

1. Aser Yisui ashi "Oba parnok dang tai tokang kechiaser parnoki kechi inyaker aji parnoki memetet" Luke 23:34
2. Aser Pai pa dang langzü, "Atangji ni ne dang shidi, tanüsa na kü den Paradise nung alitsü" Luke 23:43
3. Aser kodang Yisui tetsü aser pai meimba nütsüng anasa nokdaka angu, pai pa tetsü dang ashi "Tetsur ne chir ajiang" Idangji ano pai nütsüng dang ashi "Netsü ajiang" Yn 19:26-27
4. Asembaji meta nung Yisui ola adoka ayimten "Eloi, Eloi, lama sabakthani" koba tetezü kü Tsüngrem, kü Tsüngrem kechiba nai ni toktsür? Mark 15:34
5. Ajisür külen mapa ajak renema arur ta Yisui meteta Laishiba nung shia aliba ataloktsü asoshi pai ashi, "Ni tsürar! Yn 19:28
6. Kodang Yisui tasentzüji agizük Pai ashi "Ya renemogo" Idangji Pai tekolak angüma lua Pa tanela odaktsü Yn 19:30
7. Aser Yisui ola tulu agi ayimtena ashi. "Oba ne ket nung ni kü nüla bendanga agütsür." Aser aji shir külen Pai pei taküm bendanga agütsü. Luke 23:46.

### Diabetes tashidak indang temetettsü kar

# : Diabetes tashidak ya senmang amai menatepba tashidak ka lir, anungji pei tsürabur aser adianutem iba tashidak agi kangshiba otsü lira, pi dang nungibo nasa tekümdangba alitsüla. Ajisüaka, pei tsürabur aser kinüngertem shinga daka diabetes timtem maliyonga, nü dak iba tashidak agi matongtsü ta mali, kechiyong iba tashidak ya nisung ka libaliro aser achiajemba nungi adoker. Chiyongtsü mashimashi chia ajemba, temang touzük talila kümdaktsüba, temang marakzüki kazüa dang aliba, kanga shisaboluba aser tera dang mejangba amala ajanga temang nung diabetes timtem adoktsü. Peisasa achiajemba aser taküm libaliro nung kümdanga lira, diabetes tashidak nungi kümzüka alitsü melamelar asütsü.

# : Nisung karbo tar den mesütep temang kanga tulu küma chizük lir, anungji item dakji temelaba diabetes timtem agi atongtsü. Ajisüaka, ano nisung karbo temang touzükji shitak dang süaka teberem (waist) tulu kümer lira, iba jagi diabetes timtem agi melaa atongtsüa akok. Aji oda, nisung karbo pei tar (height) den medemdangdangbo temang touzükji shitak dang saka teberembo tulu küma teboklen chizüka alua alitsüa akok. Itemji dakji tebok telonglen temo alitsü, anungji diabetes timtem agi atongtsü ana nung lir. Na tetsür süra akok tashi nü teberem tasazükji inch 33 dak tali tekümdaktsü aser tebur sür inch 35 dak tali tekümdaktsü. Iba ama kümdanga aliba jagi diabetes timtem ama nungi kümzüker.

Source - Internet.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Asenok ajaki kaket kanga azüngtsüla : Rev.Dr.Wati Aier



**Dimapur, April 14, 2023 :** Tanü asüng asenok aikati kaket mazünger, iba jagi mapa aika nung tangar memeneper, anungji asenok ajaki kaket kanga azüngtsüla ta Oriental Theological College nung taoba principal, Rev.Dr.wati Aieri metetdaksü.

Pai iba o ya tanü yangi Operation Mobilisation (OM) pur kaket ayokba dokan City Tower anasa aliba nungi Anwar Hussain Road nung Dimapur Sumi Baptist Arogo aser Chakhesang Baptist Arogo tenla ki na tsüngda ki ka nung belena

bener aruagi tasensa lapokba sentong ka nung jembidang metetdaksü.

" Tanü asüng arogo nung tenzükertem aser Laishirtem dang nungibo Lai mashirtem 'secular' purtemiang kaket tazüingba, ajisüaka tangar dangi osang tajung bener aotsü purtemisa kaket tazüingba azüngtsüla, iba jagi dang tanü putu yimyatem koka otettsü," ta paisa ashi.

" OM ya alima ajaklen Tsüngrem o agi atongtsü nükjidong nung tenzü. Tanü temeyoktep tamangba yimsü

aliba putu nung nisung aikati tangar yimsü dena lenji oa amangteper, ajisüaka asenok Khrista dak amangba purtemibo Yisu Khrista osang tajung sangdongtsübaji maaki inyakttsüla," ta Wati Aierisa metetdaksü.

India nung yimti tulu balala nung OM kaketem ayokdak lapoka lir aser item rongnung North East India kija nung kaket ayokdak 6 lapoka lir. OM ajang kaket ayokba ya senotsü tajangzük atema inyaker masü saka Tsüngrem o prokba mapa ka lir, anungji OM kaketem ajak jenjang dalang agi angur ta OM Books, Hyderabad nung Managing Director, K.J.Johnny-i metetdaksü.

Tanü iba sentong nung Covenant Baptist Church, Dimapur nung sannüker Yabang Longkümer menden liasü aser South Asia & Gulf OM Books, Hyderabad nung Distribution Director, A.Edwin-i OM nung inyaker aser parnok mapatem atema sarasademtsü.

OM kaket ayokdak ya Lai o ratettsüba aser bushiba kaketem den tanela aser lenisüba mapatem teyuba kaketem aika angutsü. Ano, arogo nung kibuba benjong nung nüngdakbatem aser tenla sen sarudang amshiba juli aser kidang ayutsüba frame tajung angur.

# Mumbai nung Khristan 7,000 dak tema adenshia longkak ait



April 12, 2023 nü Mumbai nung Khristantemi longkak aitba mapang tangokba noksa nung angur. Maharashtra nung Khristantem anema inyakba tatalokba kanga bulua akümba anema Khristantemi longkak ait.

**Mumbai, April 14 (Agencies):** India nung Khristantem anema inyakba kanga bulua akümba anema taküm February ita nung New Delhi nung Khristantemi longkak aitba sülen April 12, 2023 nü Mumbai nunga Khristan meyrjang aika adenshir longkak aitogo.

Mumbai nung ayongzükba longkak aitba sentong nungji Khristantem pusema Hindu aser Muslim nungera aikati shilem agia liasü.

Samast Christi Samaj (All Christian Community)-i ayongzükba sentong nungji Khristan melungtet telok 80 nungi nisung 7,000-8,000-i

shilem agia longkak aitba sülen parnoki Maharashtra Chief Minister, Eknath Shinde nem temepishiba shidi ka agütsü. Shidi nungi takhangba onük 20 lir.

Temepishiba shidi nungji yamai shia lir, "Tamangba yimsü lenirtem anema tesempa o jembir aser lenirtem anema inyaker, tekülem sentong tagidak mapang nung timtem agütsür, lokti adenshia tekülem agiba nokdang aser Khristantemi kangshia tamangba yimsü meyipdaksür," ta tiyazü nung tai tongloktsür."

Osangbener den jembidang Samast Christi Samaj otongdar, Dolphy D'Souza-i, "Tamangba

yimsü kangshia meyipdaksür, ta tiyazü nung tai tonglokja yimjung meimer Khristantem anema inyakba ya anentsüla," ta ashi.

India kübok state 12 nung anti-conversion ozüing benoka lir aser item state teimbaka BJP-i yimsüsüba state tem lir.

Maharashtra nunga Eknath Shinde-i aniba BJP teloktep sorkar lir.

Bombay Catholic Sabha (society) nung Tir, Dolphy D'Souza-i, "Maharashtra nungbo sorkari anti conversion ozüing mebenoktsü onoki akhanger. Iba ozüing benokra kari maongka agia Khristantem anema inyakttsü," ta ashi.

**(Maneni tapak 7 nung...)**

# ANOGO ABEN TSÜNGREM DEN

## Talangi Atuba

"Aser pai ni Tanela nung tenem tulu talang kati anir atu..." J.Adok 21:10

Iba ama mapang nung asenoki tebilemba balala aika adoker. Alima nung mapa tulu adoka temelenshi adoker. Kijaji kodanga yareta makümer. Aji oda liaka mapang ajak nung tebilemstü tulutibaji kija takümü lir. Iba dang tali ajak metetsang kodaker Tebui nisung ka kisüing yimsüsür inyakba ama telok dak meinyaker. Meimchir Tsüngrem mesükba nung yanglu nungji, petinu tulutibajia meimchir dang nungi tilaba lir. Ajemalutiba tamanger kajia orion aser pleades yanglusang senti züi Kalvary kangki nung alizük nung pa/laji senti lir! Teti dang repranga aliba Tsüngrem tenükji kija taküm shia repranga nüka lir ta tangatetba asenoki iba küm tasen tenzükdü.

Khristan ka ama tanü tensa terenlok ajak asenoki tenem kolak nungi reprangtsüla. Asenoki temejujket nung noktak nung dang talang nung aliba angutsü. Ali telemok nung mener alima tebur tajungji mangutsü. Ajungket nung mangdang angur. Asenoki lenden tuluba aser metong talangba nguner asenok tenem temejujket nung noktaksüla. Yohan dang Tasen Yirusalem sayutsü atema Pa tenem tulu talang kati anir atu. Ibai masü dang Pa tzüyim küm nung notaker Tsüyim tarok nungji adokba shiruru ngua liasü (J.ADOK 13:1). Tanüa asenoki tawa- tanü lima nungji adokba shiruru aika angur, aser ishikatidang "Tasen Yirusalemji" anüng nungi aluba angur! Aika teküpboklen Tsüyim kümbang nung alir. Idakji tepuatsü aika dang lir. Idakji TV aser radio nung inyakerkem alitsü. Anungji idakji anogo shia osang kaket adoker. Magazinetem adoker. Idakji leman nung sensakasenba aser business alitsü.

Khristar nübur alima tzüyim jenjanga alitsüba kodanga masü. Asenoki tenem kolakji reprang, shidakba tangatetba nung rangloksüla, shidakba tangatetba bushitsüla. Asenok tensa tatalokbatemji ain kar shin o den medemdanga, Tanela Temeshi tenük ajanga, Tsüngremer nükjidong aser Khristai tatem nung takok anguba nung rangloker angatettsüla. Asen mapang nung tzüyim nungi adokba shirurudem jaki memeteti "Tasen Yirusalem" asoshi terenemba akar. Tatensa Kibubai takok angutsüba kuli asür.

Saka asenoki anogo shia taküm nung iba mangdangji koda ayutsü ? Asenoki Laishiba anasa alitsüla. Asenoki Tanela jashidaksüba mapa, aser telung nung pa kuli asüba anema kümdangtsüla. Tanela Temeshi dak metaloker asenoki küm tasen terenemba lemtettsüla.

Asenoki küm tasen nung item tezüngzüktepeba Kibuba den yanglura iba tetezü mejembitetba temoatsütem angutsü. Ni anogo shia sarasadem nung minute semer dak tajemba magütsütsü. Ni hopta shia nisung ka dangbosa Kibuba indang kuli asütsü. Ni anogo shia Tejen aser Tasen Lai nungi maneni azüngtsü. Ni kü taküm nung Yisu melen kecha leman meshimtsü. Asenoki iba küm tepiyong lira, iba jaki tesünep teimla kuli asütsü.

## Changtongya Town Baptist Arogo

P.O.Changtongya, 798613, Mokokchung: Nagaland, India. Email: ctbaoffice16@gmail.com

Ref no: CTBA/23/2022-2023 Changtongya Town the 14th April, 2023

### FELLOWSHIP AGITSÜ AYONGER

Temeim Changtongya Town sanger bendanglen alirtem aser anükapang tajungtem, tamasa Changtongya Town Baptist Arogo aser New Church building construction fund raising Committee ajanga Yisu temeim salem metetdaksür. Tanü iba osang kaket ajanga nenok den nüngdak osang ka lemsateper. Changtongya Town Baptist Arogo, New Church building construction fund raising Committee nenok den arua fellowship ka aginer, anungji na mazüngi liaka teküboklen agüja aliba tesemi arua fellowship nung tendaktsünüa mepishir.

1. Kohima  
Anogo: 17th April 2023  
Mapang: 5: P.m  
Tesem: KABA Fellowship Tenla ki, Minister Hill
2. Dimapur  
Anogo: 18th April 2023  
Mapang: 3: 00 P.m  
Tesem: Tourist lodge, Near old NST

Sd/-  
Rev. Temshi Pastor  
CTBA

Sd/-  
Mr. T. Meyi Lkr, Convener  
CTBA New Church Building  
Construction Fund Raising  
Committee

**AO OSHI ANGAZÜKDAK:  
TANÜ ANGAZÜKTSÜBA OJANG**



Tir Yimyim

**Poktet**

- (v) mali asüba nungi adok (originate)
- \* Aortemi asenok ya longtrok nung poktet ta jembir.

**Pokiymer**

- (n) chiyongtsü bushir nisung (searcher for food)
- \* Asenok ajak ya alima nung pokiymer amato alir.

**OLONG PAITEP # 6487**

|    |    |   |    |    |    |    |    |    |    |
|----|----|---|----|----|----|----|----|----|----|
|    |    |   | 1  |    | 2  |    | 3  |    | 4  |
| 5  |    | 6 |    |    | 7  |    |    |    |    |
|    |    | 8 |    |    |    |    | 9  |    |    |
| 10 |    |   |    |    | 11 | 12 |    |    |    |
|    |    |   |    | 13 |    |    |    |    | 14 |
|    | 15 |   |    |    |    |    |    |    |    |
| 16 |    |   |    |    |    |    |    |    |    |
|    |    |   | 17 |    | 18 |    |    | 19 | 20 |
| 21 |    |   |    |    | 22 |    | 23 |    |    |
|    |    |   | 24 |    |    |    | 25 |    |    |
| 26 |    |   |    |    |    |    |    |    |    |

**TIPIEN**

- 3. Tsünglang masü - (4)
- 5. Tanü-asüng - (4)
- 7. Tenüng atet - (3)
- 8. Külem - (4)
- 9. Tetsüng-i ao - (4)
- 10. Tinen - (3)
- 11. M \_ \_ \_ ng - (3)
- 14. Aou tapu ka - (3)
- 15. Atangji nung atalokba - (9)
- 16. Alima nungi pila - (3)
- 17. Mesükteper - (3)
- 19. Ola tashi-i adok - (3)
- 21. Sen meyong agütsü - (4)
- 22. Aor benjong ka - (4)
- 24. Netsü tedi - (3)
- 25. Temang nung zübo aket - (4)
- 26. Tsükchiri longpang - (4)

**LANGTSÜNGLEN**

- 1. Tepok nung shilem ka - (3)
- 2. Nisan - (4)
- 3. Nülak mesük - (4)
- 4. Amua ao - (6)
- 5. Mapa melena sen anguba - (3)
- 6. Jang asepa oset - (6)
- 12. Mit adok - (4)
- 13. Khu abenba meyakküp - (4)
- 14. Kecha memeshi - (6)
- 15. Asür yim - (6)
- 17. Inyaktet - (4)
- 18. An-i entsü awabang - (4)
- 20. Süngküm - (3)
- 23. Tesangwa agütsü - (3)

**OLONG PAITEP # 6486 TELANGZÜBA**

**TIPIEN :**

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

**LANGTSÜNGLEN :**


- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI-A YA METETTER MA**



Mejangba mapang nisung 8 rongnungi nisung katibosa teni akonger, aser nisung 10 rongnungi nisung katibosa tebo ashiteper.

**Noksa nung meputepi aliba 10 bushiang**



**Guinness World Records-i 'Bihu' tsüngsang aser 'Dhol' iogo**



**Guwahati, April 14, 2023**

**(Agencies):** Assam nung tsüngsanger aser asüm atemer nisung 11,304-i Guinness World Records ka yangluogo ta Chief Minister Himanta Biswa Sarma-i metetdaksü

Nisung teimtibai tesem ka nung 'dhol' shilem agi, ta pai ashi.

London nung Guinness World Records headquarters nungi adjudicator lia nisungtemi 'Bihu' tsüngsang aser 'dhol' shilem agi.

"Onoki Bihu tsüngsang aser Bihu dhols atema world record ana yanglutetogo. Iba ya tesem ka nung nisung teimtibai Bihu tsüngsang aser Bihu dhol shilem agiba lir" ta Sarma-i Sarusajai Stadium, Guwahati nung ashi.

Guinness World Records nung 'Bihu' zülüoktsüba ya Assam sorkari ketdangsia inyak aser senotsüji culture department ajanga endoker.

Controller General of Patent, Designs and Trademarks and Registrar of GI Registry Unnat P Pandit-i CM Sarma nem 'Gamosa' (Assamese scarf) atema Geographical Indication registration certificate agütsü.

'Gamosa' ya Assam nunger sobaliba aser maitsü lir aser December 2022 nung Centre sorkar nungi GI tag ngua liasü. Küm 5 sülen Centre sorkari GI agütsü.

**Manipur nung Arogo lennirtemi poppy lu ayimba anema noktaker**

**Imphal, April 14, 2023**

**(Agencies):** Manipur nung arogo lennirtemi tenemlen poppy lu ayimba aser opium yangluba anema noktaker.

All Manipur Christian Organization (AMCO)-i April 14 nü Imphal Hotel nung "Christian Consultation on drug problems in Manipur" sentong ayonga agi.

Iba sentong nung state nung arogo lennir aika aden aser AMCO president Reverend L

Simon Raomai tongti tesemdang liasü.

Arogo lennirtem dang Manipur tenemlen poppy lu ayimba indang tebilemtsü abentsü ayongzüka agi.

"Manipur tenemlen poppy lu ayimba anendaktsütsü atema Arogoi tongtipang shilem agitsüla" ta Reverend L Simon-i ashi.

State sorkari war on drugs ya yimtittem aser valley districts

nung dang temulung agütsür saka tenemlen sensakertem aliba tesemtem sendoker, ta pai metetdaksü.

Arrotsülen aliba arogo lennirtemi peii akokba tashi poppy lu ayimba azüoktsü atema mapa inyaktsü ta tanü tesentepertemi bangzüngtep.

Manipur nung arogo lennirtemi iba tebilemtsü abenba ajanga state asoshi tarutsü anogotem tajungba akümstü teimla lir.

**Arunachal nung arrtsülen yimtsüngtem tourists' hubs akümer**

**Itanagar, April 14, 2023**

**(Agencies):** Arunachal Pradesh kübok China den arrtsüa aliba yimtsüngtem India sorkari tourists' hubs akümstü meranger.

Arunachal Pradesh arrtsülen aliba yimtsüngtem tourists' hubs ama renlokba ajanga Idia-i LAC anasa China madak tashi temaba akümba sayutsü.

China sorkari Arunachal Pradesh nung tesem 11 nungja melenshiba ajanga India aser China tsüngda tesentaktep mejungi aküm.

China-i Arunachal Pradesh dang 'Zangnan' ta ajar aser iba ya "South Tibet" ta züngshir.

China-i LAC anasa "model villages" yanglur aser tesüiba küm 10 tashi Ladakh nungi Arunachal Pradesh tashi parnoki iba mapa inyaka arur.

Iba atema India sorkari Arunachal Pradesh nung China den arrtsüa aliba yimtsüngtem tourists' hubs kümdaktsür.

Arunachal Pradesh kübok Kaho, Kibithoo aser Meshai nung homestays, camping sites aser trekking routes tajungba

kümdaktsüba mapa inyakdar. Arunachal Pradesh sorkari World War II tayimtsütem tsükokba tesemtem tourists' spots kümdaktsütsü tebilemba lir.

World War II mapang United States indang aircraft 650 aser airmen 400 jungnüa "The Hump" nung samaa liasü.

"The Hump" ta asüba ya Arunachal Pradesh, Tibet aser Myanmar sendaktepba lenmang lir aser allied forces-i iba lenmang ajanga Chinese army dangi materials & supplies bener yok.

**Moirang nung INA-i linük wako atsüketba bilemteta among**

**Imphal, April 14, 2023**

**(Agencies):** Indian National Army (INA)-i wako atsüketba 79 buba benjungmong Manipur kübok Moirang nung agiogo.

Moirang nung INA Martyr indang complex nung Indian flag atsüket aser iba mapang Netaji Subash Chandra Bose nem naru yuja tetushi agütsü.

India nüjiso atema rara nung taküm bendanga agütsür INA sepaitem nem tetushi agüja minute ana ola madok.

Moirang assembly constituency MLA Thongam Shanti lia Akhil Bharatiya Poorva

Sainik Seva Parishad (ABPSSP) ajanga linük wako atsüket.

Iba sentong nung o jembirtemi Subhas Chandra Bose ajanga British yimsüsüba nungi linük anitetba indang jembi.

Indian National Army (INA) nungi Colonel Shaukat Ali Malik-i mezüng atema April 14, 1944 nü Manipur kübok Moirang nung linük wako atsüketa liasü.

Netaji Subhas Chandra Bose-i linük nüjiso atema rara nung shilem tajung agiba bilemteta Manipur Governor Anusuiya Uikey-i o jembi.

Netaji aser INA ajanga linük meimtsüba akasodaktsü. Netaji Subhas Chandra Bose-i linük meimba ajanga alima tesem balala nung nübortem pei lima meimtsü ajungmesor ta Manipur governor-isa ashi.

Linük nüjiso atema rara nung Manipur nungeri shilem tulu agiba atema konang agir, ta laisa shisem.

INA indang rara teimbaka Manipur nung atalok aser Manipur nungeri linük nüjiso atema taküm bendanga agütsüogo ta Governor Anusuiya Uikey-isa metetdaksü.

# Myanmar mitkari tayimtsü amshia amakba ASEAN-i aitsür

**Naypyidaw, Rongchii/April 14 (Agencies):** Myanmar mitkar temi central Sagaing region nung aliba yimtsing ka nung bomb poklokja tanurtem densema nisung aika tepsetba asoshi Southeast Asian linüktemi kanga sashia aitsüogo.

National Unity Government (NUG) ajanga par People's Defence Force (PDF) militia unit ka atema sentong ka ayongzüka lia tayimtsü amshia amakba Myanmar mitkari nangzüker anogo ka lir Association of Southeast Asian Nations (ASEAN) ajanga Brestibarnü iba sangdong agüja liasü.

2021 küm February ita mitkar tashi amshia sorkar atsüngdokba general temi amakba ya United Nations, United States aser danga linük temibo aitsür liasü.

"Tawa Pa Zi Gyi yimtsü nung Myanmar Armed Forces temi tayimtsü amshia amakba ASEAN-i tashi agi aitsür," ta regional bloc ajanga ashi.

"Yimya balala nung azüdokshiba ajak tangsa anentsüla, talisa civilian tem anema tashiyim amshiba anentsüla," ta ashi.

"Ibai ajanga dang Myanmar nung teti atema yimjung tangatetep kati arutsü asoshi jembishinütsü atema tensa tajung bener arutsütsü."

Mongulbarneep community hall nung fighter jets temi bomb pokloktsüba mapang nisung 100 asü, ta osangtem ajanga ashir. Iba sülen helicopter nungi injang khalokja aru aser teyari agütsütsü meranger nem tetsükdaktsü agütsü.

Iba lendong nung asür nisung 133 jungogo, ta Brestibarnü tashinung

osangtem ajanga jangjatsür. Bodhbarnü nisung tasü mang 80 shi remogo aser ano nisung 40 shi temang bushiba maparen anendaka lir, kechiaser ano tayimtsü amshia amaktsü tsübor, ta yangji alir kati osangbener dang ashi.

Aung San Suu Kyi aser lar National League for Democracy (NLD) party atsüngdokba mitkar lenir Senior General Min Aung Hlaing kübok mitkar temi azüdokhia aruba rongnung ibai tesashitiba ta züngshir. Mitkar temi atsüngdokba legislator aika NUG nung lir.

ASEAN ya züngsem ter aliba regional bloc ka lir, kong Myanmar densema lir aser parnoki mapang talangka nungi iba telok züngsem indang tashi nungi pilar lia arur aser parnoki anir iba rara tembangtsü asoshi jembishinüa arutagi.

Sorkar atsüngdoker Min Aung Hlaing den onük pongu nung yimjung sentong yangluba regional bloc sentongtem nung terenlok kangabo mali.

Tsükchitep anentsü asoshi yimjung sentong yanglua ajak densema jembishinütsü ajungshiba mapang iba linük nung azüdokshi ang tali akumer.

Southern Karen state nung kanga sashia khatepba ajanga nisung meyerijang aika arutsü alema Thailand leni jena orr anogo ishika lir Pa Zi Gyi yimtsü nung ya amak.

Meimchir temeden asoshi nokdakba telok temi ashiba agi, iba linük nung rara agi nisung meyerijang aika takum samatsüogo aser ano million 1.2 shi pei ki yutsür tesem balala nung jenoka lir. Mitkar temi sorkar atsüngdoker küm ana jungogo aser PDFs aser ethnic armed groups temi mitkartem den maneni rarar.

Ajisüka Min Aung Hlaing-i NUG den jembishinü akatsü memolunger aser pa anemertem ya linük samatsütsü adokba kiralongrartem lir ta ashir.

Yimjung sentong nung terenlok maliba yong ASEAN-i Myanmar merenshia iba bloc indang sendeni marudaktsü saka züngsem kari mera tesashiba agitsü akhanger.

Taküm iba bloc menden ya Indonesia lir.

March ita Malaysia Ato Kilonser Anwar Ibrahim-i Philippines semdangba mapang, ASEAN aliba tejangja metetdakja Myanmar nung timtem adoka aliba angatetepba nung yaritsüla, ta shia liasü.

"Ibai linük telungzük indang tebilemstü kisung masü, anungji ASEAN tembartem dang asenok tashi itshitsüla ta ashir. Nüngdakra iba linük indang sepaitem den jembitsüla, kechiaser mitkar lenirtemi civilian tem tatongba mangateter," ta Anwar-i shia liasü.

Bodhbarnü Malaysia indang Foreign Minister Zambry Abdul Kadir-ia tebilemstü akaba lemsatepa liasü aser Malaysia-i Myanmar nung tang azüdokshiba anemer aser ibaji ASEAN rangben tangatetba lir, ta shia liasü.

ASEAN nungya Brunei, Cambodia, Indonesia, Laos, Malaysia, Myanmar, the Philippines, Singapore, Thailand aaser Vietnam linüktem lir.

## TENÜNGSANG AGÜTSÜR

Lirmen yimtsü nungi onok asür C. Imyangluba Aier semchirtemi kanga dang nema danga teküboklen agüja aliba lenirtem nem konang tetushi agütsür.

1. **Shri L. Mayang Aier-i**, Senior Superintendent of Police Nagaland Lokayukta Police, Kohima, jenjang ngutetba atema.
2. **Shri Lanutoshi Aier**, Ao Kaketshir Mungdang (AKM) tir mapa abentsü shimba atema.

Nenaprongla khuret tasen agizüka nüburttem ajungkettsü atema inyakba mapang, mapa takok ngua inyakyonga aotsü yimlajia ataba den nenati inyakba ajak nung Tsüngremer shisatsü, len aniba, tekümzüka aser takok agüjang ta sarasademtsür.

## GOVERNMENT OF INDIA

MINISTRY OF DEVELOPMENT OF NORTH EASTERN REGION  
NORTH EASTERN COUNCIL SECRETARIAT  
NONGRIM HILLS SHILLONG - 793003

No. NEC/NERCORMS/MD/RCT/2023 Dated : 13-04-2023

### ADVERTISEMENT

Applications are invited from India citizens for appointment to the post of Managing Director, North Eastern Region Community Resource Management Society (NERCRMS) on deputation basis. The applications complete in all respect should reach the office of the undersigned and addressed to **Adviser (Horticulture), North Eastern Council Secretariat, Government of India, Nongrim Hills, Shillong - 793003 (Meghalaya)** within 30 days from the date of publication of the advertisement. The details regarding pay, eligibility criteria, etc are mentioned in the detailed advertisement placed and hosted in the website [www.necorps.org](http://www.necorps.org) and [www.necouncil.gov.in](http://www.necouncil.gov.in)

Sd/-

( K. Moses Chalai ) IAS  
Secretary, NEC & Chairman, NERCRMS

## GOVERNMENT OF INDIA

MINISTRY OF DEVELOPMENT OF NORTH EASTERN REGION  
NORTH EASTERN COUNCIL SECRETARIAT  
NONGRIM HILLS SHILLONG - 793003

No. NECBDC/RR/MD/407/2023 Dated : 13-04-2023

### ADVERTISEMENT

Applications are invited from Indian Citizens for appointment to the post of Managing Director, North East Cane and Bamboo Development Council (NECBDC) on deputation basis. The applications complete in all respect should reach the office of the undersigned and addressed to **Director (T&I), North Eastern Council Secretariat, Government of India, Nongrim Hills, Shillong - 793003 (Meghalaya)** within 30 days from the date of publication of the advertisement. The details regarding pay, eligibility criteria, etc are mentioned in the detailed advertisement placed and hosted in the websites [www.necbdc.in](http://www.necbdc.in) and [www.necouncil.gov.in](http://www.necouncil.gov.in)

Sd/-

( K. Moses Chalai ) IAS  
Secretary, NEC & Chairman, NECBDC



## GOVERNMENT OF NAGALAND DIRECTORATE OF TECHNICAL EDUCATION

Nagaland : Kohima - 797 004

☎ 0370-2270409  
☎ 0370-2271432

NO.DTE/SCTE/6/2020-21/4516

Dated, Kohima the 14<sup>th</sup> April, 2023

### CORRIGENDUM

NO.DTE/SCTE/6/2020-21: In Continuation to the earlier notification of the office even number dated 27<sup>th</sup> March 2022, the last date of filled application for undergoing Diploma Programme within the State run Polytechnics is **25<sup>th</sup> April, 2023** through Department website: [www.dtenagaland.org.in](http://www.dtenagaland.org.in). The application fee of Rs. 300 (Rupees Three hundred) only to be deposited to the Department of Technical Education A/C No. **40201620520 IFSC Code SBIN0000214**. The Candidates who have appeared HSLC/HSSLC final examination of 2023 are also eligible to apply for the Diploma Entrance Examination. The Candidate have to submit hard copy after filling up the forms along with necessary documents to **Directorate of Technical Education or any of the Examinations Centre on or before 5<sup>th</sup> May, 2023**.

#### Programmes offered in the Polytechnics.

| Sl. No | Name of Polytechnic   | Program Offered                            | No. of Seats | Brief of Government Polytechnics  |
|--------|---|--|--------------|---|
| a      | b   | c  | d            | e   |
| 1      | Khelhoshe Polytechnic, Atoizu (KPA)                                   | Civil Engineering                          | 60           | * Ideally located for study environment with qualified faculty.<br>* AICTE, New Delhi Approved Institutions.<br>* Quality Technical Education through hands on practical classes, entrepreneurship and Industrial trainings. 24 hours power backup facility.<br>* Civil, Electrical & Mechanical branch/program at KPA & Civil & Computer Science & Engg. at GPK accredited NBA. Others Pursuing NBA accreditation.<br>* State of the Art Laboratories with smart classrooms and internet.<br>* Hostels and Bus service available.<br>* Scholarship State as well Central Scheme.<br>* State and National activities: Seminars, workshop, Sports, Tech-fest.<br>* Online and offline admission and classes.<br>* Pass out students working in State and Central Government Offices, Private Companies and self-Entrepreneurs. |
|        |   | Electrical & Electronics Engineering       | 30           |   |
|        |   | Mechanical Engineering                     | 30           |   |
|        |   | Automobile Engineering                     | 30           |   |
| 2      | Institute of Communication & Information Technology, Mokochung (ICIT) | Computer Engineering                       | 15           |   |
|        |   | Electronics & Communication Engg           | 15           |   |
| 3      | Government Polytechnic, Seithekema 'C' Dimapur                        | Information Technology                     | 15           |   |
|        |   | Civil Engineering                          | 30           |   |
| 4      | Government Polytechnic, Sedem, Tuensang                               | Civil Engineering                          | 30           |   |
| 5      | Government Polytechnic, Tsunazho, Chetheba, Phek                      | Electrical & Electronics Engineering       | 30           |   |
| 6      | Government Polytechnic, Aboi, Mon                                     | Civil Engineering                          | 30           |   |
| 7      | Government Polytechnic, Doyang Wokha                                  | Architecture Assistantship                 | 15           |   |
| 8      | Government Polytechnic, Peren   | Interior Design                            | 15           |   |
| 9      | Government Polytechnic, Kohima (GPK)                                  | Computer Science & Engineering             | 30           |   |
|        |   | Civil Engineering                          | 30           |   |
|        |   | Fashion Design & Apparel Production (FDAP) | 30           |   |

All the terms and conditions as notified earlier remain the same.

Sd/-

(Er. VIPULHOU LHOUNGU)  
Director

# Mumbai nung Khristan 7,000... (Tapak 5 nungi...)

Mumbai nung aliba Azad Maidan nung ayongzüka sentong nungji linük tebuti, asür Mahatma Gandhi'er semchir, Tushar Gandhi-a aden.

Tushar Gandhi-i, "Khristantem ajanga kübou (Gandhi) kanga kongshia liasü," ta ashi. Paisa, Khristantem anema inyakba ya anentsüla, ta ashi.

"Tanü na anema inyakra asüngbo meimchir ajak anema inyaktsüa akok. Onoki tesempa süngdong meindaktsütsü. Onoki ibaji temeim ajanga raratsü," ta Gandhi-i ashi.

Tushar Gandhi-i, Yisu Khristai Khristantem atema dang masü saka meimchir ajak atema tenla agütsü, aser Yisu ajanga tebou ajungmesoa liasü, ta ashi.

United Christian Forum (UCF)-i ashiba agi, yaküm state 21 nung Khristantem anema inyakba tatalokba 598 liasü aser ibaji 2020 nungi asadanga shilem 81 agi teimba

akümba lir. Taküm January ita kija nunga India nung Khristantem anema inyakba tatalokba 57 liasü.

Khristantem pusema longkak aitba sentong nung shilem agir Muslim nunger lenir, Irfan Ali-i, "Kuli kar nung ajemdaker Khristan aser Muslim nunger ama minorities anema inyakba anema iba ya yimjung rally ka lir," ta ashi.

Catholic Secular Forum Tir, Joseph Dias-i, "Khristantem anema inyakba ya anentsüla, mesüra tarutsü nungbo onoki ano longkak tesashiba aitsü," ta metetdaktsü.

All India Catholic Union nung otongdar, John Dayal-i, "Iba secular linük nung state aika nung Tenla kitem aser Khristan rejutem anema inyakba anema (New) Delhi nunga February 19 nü Khristantemi longkak aita liasü," ta metetdaktsü.

## 4th Mokokchung Town Inter-Ward Football Tournament 2023 osang



Mokokchung Town Inter-ward football tournament April 14 nü tasembuba match Penli Ward o Alempang Ward na asayaba mapang tangokba noksa nung angur. Mokokchung, 14th April, 2023 (Photo Courtesy: www.nokinketer.com)

**Mokokchung, 14 April (TYO):** 4th Mokokchung Town Inter-Ward Football Tournament 2023 April 14 nü yangi Imkongmeren Sports Complex, Mokokchung nung mezüing asaya Arkong Ward o Marepkong Ward na asayaba Arkongi goal 4-1-i Marepkong madak takok tulu angu.

Tanabuba asaya, Dilong Ward o Artang Ward na tsüingta asayaba, Artang-i goal 3-1 agi akok aser tasembuba asaya, Penli Ward o Alempang Ward na asayaba, Penli ward-i goal 2-0 agi Alempang madak takok tajung angu.

Tanü mezüing asaya nung, Arkong nungi forward par pezü; jersey No 11 - Tajungsang, jersey No. 14 - Talijungba, jersey No. 8 - Ariping aser jersey No. 5 - Inovi Chishi parnoki minute 10,

26, 30 & 51 nung goal kaka idaktsü. Marepkong Ward-ia kanga meranga asaya saka parnoki goal ka dang küptoktet aser iba goal ji striker jersey No. 11 - Imlisanen-i minute 56 nung yok.

Tanabuba asaya nung, Artang nungi forward jersey No. 7 - Chuba Imchen-i mezüing asaya tesa dang tenzüker minute 7 dang or lia goal ka agütsü, iba sülen par külem medemer forward jersey No. 12 - Yashimereni minute 24 nung goal ka aser tanabuba asaya tesa dang minute 40 nung goal ka idakja Artang puri asaya rangben amokseper aru. Saka meimlai Dilong striker jersey No. 12 - Temsuyanger-i asaya tatemtsü minute ka dang lia goal ka küpzüka iba asaya Artang-i koka tembang. Asaya asemububa, mezüing

asaya tenzüker metenzük ka nung minute 2 dang or lia, Penli puri Alempang tsütsülen ball bener aorba, Alempang defender jersey No. 2 - Takusungba-i ball metsütokerba maziükteti pei sasa (own goal) goal ka chiatok aser iba sülenjibo mezüing asaya tesa dang tematok. Aji oda, asayar tem anisüngzüker agir külen, Penli nungi Midfielder jersey No. 8 - Imsuwapang-i minute 46 nung maongka tajung ngua goal ka idakja parnoki goal 2-0 agi takok ngua liasü.

Asüing April 15 nü tatembangbuba league match mezüing asaya Majakong Ward o Kumlong Ward na niking 1:00 ako nungi aser tanabuba asaya Yimyu Ward o Tongdentsuyong Ward na 2:30 nungi asayatsü lezmükja lir. Hombar nungibo quarter final match asayatsü.

## Bayern Munich-i Sadio Mane nem tenokdangba agütsü



**Berlin, Rongchii/April 14 (Agencies):** Iba hopta Champions League nung Man City makokba sülen Leroy Sane den mangatettep adokba atema Bayern Munich-i Sadio Mane nem asaya ka atema tenokdangba agütsüogo, ta club sangdong ka ajanga metetdaksü.

Bild osang kaket sangdong ka ajanga ashiba agi, Mongolbarnü tamakok anguba sülen taoba City winger Sane dak Senegal nung asayar yagi tejak nung tsüingoktsü aser pa tebangmechi shisa liasü.

"Arishi küm 31 tain Sadio Mane taruba Honibarnü 1899 Hoffenheim den kidang asayaba mapang FC Bayern

squad nung madentsü," ta Bayern sangdong ka ajanga metetdaksü.

"Champions League nung FC Bayern pur Manchester City nung oa asayaba sülen Mane-i yimya yimpong shidak mebenshiba atema iba tenokdangba agütsüogo.

"Iba den bendenloksema Mane dang senchi achitsü," ta kasa sangdong ajanga metetdaksü. Ajisüaka asayar ana tsüingda mangatettep adokba indang Bayern-i kecha osang magütsü.

Bild sangdong ajanga ashiba agi, Manchester nung Bayern-i asaya makokba asaya tatembanglen tena tsüingda mangatettep adoka liasü aser

footage balala ajanga tena ground nung asatepa sayuogo.

Mane aser Sane naprongla Brehostibar anepdang training ground nung nguogo.

Iba asaya makokba ya 2017 küm sülen Bayern atema Champions League nung tamakok tulutiba liasü.

European championship trokben tashi koker aliba team asoshi iba asaya akoktsü atema kangabo timla makai kümogo. Team ana tsüingda Munich nung Bodhbarnü tanbuba leg asayatsü.

Mane 2022 küm Liverpool nungi Bayern nung arua adenba sülen kanga jangrademabo masayateti arudar.

African Player of the Year naroküm anaben tashi ngur alisang yagi Bayern atema tetoktepba ajak nung mezüingbuba asaya tenet nung goal trok idaktsü, ajisüaka October ita nungi tang tashi nung goal ka danga idakja mali. Kasa mapang nung pa November ita yiruba ajanga Qatar World Cup nunga masayateti liasü.

## Rafael Nadal ATP Barcelona asayamung nung masayatsü

**Rongchii/April 14, 2023 (Agencies):** Rafael Nadal-i Hokolbarnü sangdong ka ajanga pa ATP Barcelona asayamung nung shilem magitetsü ta metetdaksüogo.

Arishi küm 36 tain asayar yagi ashiba agi, pa January ita Australian Open asayaba mapang yiruba tangtashi taneptsü junga mongui lir. Pa taneptsü junga mongutetba ajanga iba hopta Monte Carlo Open nunga masayatetsüsa aküm.

"Ni ano renema mali, anungji tetoktepba balala nung shilem agitsü atema ni maneni renemshitsü," ta pai tweet asü.

Barcelona nung asayamung ya Honibarnü tenzüksü aser French Open May 28 nungi tenzüka asayatsü.

Nadal-i ashiba agi, Barcelona asayamung nung shilem magitetba atema pa kanga mepelar.

"Barcelona nung asayamung ya ni atema kanga tongtibang lir, kechiyong iba ya ni adopt asüba

club aser kidang asayaba ya tanga ajak dang nungi balaka lir," ta pai ashi.

Grand Slam 22 tashi koker aliba asayar yagi mezüingbo pa ita anashi dang masayatetsü ta bilema liasü.

Pa clay court season tenzüka mapang nungi asayatsü tebilemba nung Indian Wells aser Miami nung hard-court asayamung nung shilem magitsü atema telemtetba agia liasü.

Pai taoba küm French Open 14buba akokba sülen pa yiruba ajanga mapangshia timtem agüja arudar.

Pai tetsüing tabelen yirur liaka Casper Ruud akok aser tebok yiruba ajanga Wimbledon nung semi-final masayatetsüsa aküm. Nadal ya arishi küm 18 asüba mapang pa dak Müller-Weiss syndrome puteta liasü.

Pa mapang talangka masayatetba ajanga 2005 küm April ita sülen tang mezüingbuba top 10 nungi tuguogo aser tang jenjang 15buba nung lir.

## Leicester coach asütsü Dean Smith shimogo

**Rongchii/April 14, 2023 (Agencies):** Leicester-i Hombar nü taoba Aston Villa manager Dean Smith season tatem tashi coach mapa bendaktsütsü atema shimogo.

Smith ya taküm küm tetenzüklen Norwich toktsüba sülen mapa kecha minyak liasü.

Pa lenisüba nung Leicester pur Premier League nungi relegate masütsü atema takok tashi asayatsü.

April 2 nü Brendan Rodgers mapa nungi anentsüba sülen Smith lenisüba nung Leicester pur tanungba asaya ti asayatsü.

Pa nem Craig Shakespeare aser John Terry nati teyari agütsütsü.

Rodgers-i club toktsür aoba sülen Leicester pur asaya anaprongla nung tamakok nguogo. Parnok dang jenjang

19buba nung lir aser point ana agi dang relegation zone-i mai lir.

Arishi küm 52 tain coach atema iba mapa ya kanga melara masütsü. Leicester pur taruba asaya Honibarnü Manchester City pur den asayatsü lir.

"Season tatemlen team anir asayatsü atema maongka anguba atema ni kanga pelar," ta Smith-i Club indang official website nung ashi. "Onok jakdang kechi ali aji tejanga saka iba ya ni aser kü kübok coaching team-i ajangshidangogo aser squad nung asayar tajung aika lir aser asaya-a peria anunga lir asünung nükjidong tongtetsü," ta pai ashi.

Villa pur Premier League-i meyipa aitba sülen mezüingbuba season nung kasa tia ajangshia liasü aser Smith lenisüba nung parnoki mapa tatsüka tsüingda nükjidong tongteta liasü.



Lt. G. Rio Memorial U-19 Inter-District Cricket Tournament asayatsü asoshi Mokokchung District Cricket Association (MDCA) nungi asayar parnok 15 den Coach - Talikaba densema tanep Mokokchung nungi apusoba mapang tangokba noksa nung angur. Iba tournament ya April 15-24 tashi Nagaland Cricket Stadium, Sovima nung asayatsü.

## BILEMDANGANG

"Mapa inyakba ajanga masü saka shisabuluba ajanga nisung taliba okrongdaksür."